

Fasnacht 2025

Blagèèr!



e VSG Bangg

Wenn uff dr Stross zwai schwätze isch es esoo
z Basel kasch maischtens kai Wort verstoo
In drissig Joor oder au glii
Kennti Baseldytsch e Ghaimsprooch sii

D' SVP isch wiider im Elemänt
Dr Jans sigi überfordertet im Departemänt
I froge mi drum warum wieso
Hett dr Röschi d'Justiz nit ybernoo

Au in de Baize musch mit de Toilette gendere
Aigenligg muss dr Baizer wenig ändere
S' blibbt wie vorhär aini fyr Fraue aini fyr Manne
fyr de Räschte stellt me ToiToi ane

Dr Shakiri isch zrugg uff Basel koo
Jetze kas jo nume no nach oobe goo
Mir hoffe dass das nit yberall goot
Susch wird dr Wessels nomol Regierigsroot

Wettsch z'Basel emole bürgerligg go ässe
Denne muesch d' Staine ab sofort vergässe
S' gitt yberall nume Burger s'isch nit übertriibe
Do kann i bi Türgge im Gundeli bliibe

Bi dr Basler Bolizei laufte nimmi rund
D' Aimann will wysse was isch denne der Grund
E Bricht liggt uff em Tisch e schweere, digge
E Schwoob het ihn gschriibe und e Ziircher setts fligge

Huusufgoobe selle z'Basel verschwinde
Me kaa doch Kinder mit so Züg nit schinde
Am beste wurd me d'Schuele abschaffe
so kennte d'Goofe immer is Händy gaffe

I ha kai Stutz bin immer stier
Dr gröschti Luxus isch es Denner-Bier
I duen nimmi haize d'Wohnig isch kalt
Abr d' Krankkasse han ich zahlt

Unsri Katz, die will e Bulldog sii
Er sig e Orca bildet sich unsre Goldfisch ii
Unsre Hamschter meint er sig e Reh
Alles wäg däm ESC

D'Fraue Fuessball EM findet z'Basel statt
Ohni männliche Schiri die häh si satt
Das hett e Grund jetzte muesch loose
Nur Fraue derfe in das Pfiffli bloose

Wottsch au by uns bänggle?
Uff www.vsg-basel.ch erfahrsch meh!



Fasnacht 2025



Kaffidante

Fett vom Fuudi in dr Lippe, dä Glööckler isch scho krass
E gmoolte Baart i siim Gsicht, dr Räscht isch voll mit Strass
Voll Botox gsprützt und Hyaluron, d Hoor sind nur drapiert
Und hett sii's letschte Stündli gschlaage, wiird'r als Sondermüll deklariert

Kasch Rächne, lääse und au schriibe, nur vo däm – nüt wiirgglig guet
Kasch e bitz kompjueterle, nur mit IT heesch so guet wie nüt am Huet
Kasch umeschreie, hesch dr überbilgg – ohni s' ganzi gsee
Kasch jetzt no, jo und Amen saage – willkomme – in dr Schwizer Armee

Dr Trump schmiirt sich, in sii Gsicht – e Creme wo sälber brüünt
Nur s'lääse vo däm Biiphaggzeedel – das het är versüümt
Drum gseht äär uss, wie e Orang-Utan – s'herscht diggi Luft dehäi
Jetzt weiss me au, wiso zieht s Melania – so e suure Stäi

Sind Männer im Auti uff dr Strooss, denn isch mächtig öppis loos
S'herscht Blindheit und au Anarchie – d'Unfallstatistik – die isch grooss
E Uurwald voll – Stroosseschilder – das macht die Männer muff
S Brobleem wäär glööst, wär uff dääne Schilder au e mool Fraue druff

Wenn miir gseen, waas am ESC – so umegumpt und singt
Frooge miir uns ob dää Aalass – überhaupt no öppis bringt
Es wird nur gröölt, s'Niiwoo singgt – käi Rasse und käi Glasse
Jetzt hään miir däänggt, uff die Büüni, wurd dr Elon Musk no basse

Als Kaffidante, duesch kääfele – nur s'bstelle wiird langsam dooff
E Kaffi-Creeme, kasch vergässe – s'git Chai-Grande, mit Milch vom Schooff
E Matcha Latte – e Venti Vegi – e Magiatto e ganz e helle
Bi dääm Firlefan, sind miir froh – könne miir e Glaas Wasser bstelle

Mi Maa, dä het e Schlooffbrobleem – het alewiil numme dööst
Är het aber das Brobleem – gscheit und sauber glösst
E häissi Schoggi und e Viagra – das isch wiirgglig gscheit
Die häissi Schoggi, für e schlooff – und Viagra – das är nit zum Näscht us gheit

D Geissen's, die sind dekadänt – jä, dr Ruubel rollt
Äi mega Hütte nach dr ander, schisse dien sii Gold
E riise Jacht, x- Ferrari – vo däane muess käine lauffe
Die Dekadänz – ka jetz jeede ha, muesch's äifach bi TEMU kauffe

Sit kurzem hään miir Gäld wie Hoi – sind uff äimoll Stingge-riich
Miir wäärffe s Gäld zem Fänschter uss – s'isch uns äifach schisse glich
Miir lääbe jetz, in sauss und braus – feertig mit em banaale
Säll läischte miir uns, sit miir d Stüüre – uff de Bahamas zaale

Wottsch au by uns bänggle?
Uff www.vsg-basel.ch erfahrsch meh!



Fasnacht 2025

SCHNAPS BAGGE

Wenn ych hätt miesse s'Fasnachts-Sujet bestimme,
dä wär glaar gsi, dä Fall:
Ych hätt gno: «S'Zauberfiessli isch zugg im Stall».
...und fir dr Blaggedde-Müller hätt's en nit bruucht,
dr bsunder Ysatz,
dr Xherdan hett in Originalgreessi uff dr Blaggedde Platz.

Me sait nimm Mami,
sondern Person, wo mi geboore hett
Me sait nimm Papi,
sondern Person, wo mi uffgläart hett
Me sait nimm Kinder,
sondern Persone, wo ych zygt ha, was jo stimmt
Me sait nimm Ehefrau,
sondern Person, wo aim d'Freud am Lääbe nimmt.

Es git E-Bikes und Mountain-E-Bikes,
es git au E-Wanderhose – wirgglig woor
Die hän an de Oberschänggel e E-Motor yybaut,
kunsch dr als Gipfelstürmer vor.
Als alte Duubel bruuch ych die Hose zum käschperle
mit Kätzli, nit zum Sport,
die ziehn ych uufe, bis unter d'Gürtellinie,
denn vibriert's au am rächte Ort.

Es git vil Lyt, die tien ihre volle Täller
vor em Ässe fotografiere
Und und stelle's ins Netz, damit s'Umfäld ka
mit «Duume uffe» reagiere.
Kirzlig schiggt mir Ain e 12-Gang-Menü,
ych ha mi gfrogt: «Was sell dä Stuss?»
Ha aber Hunger gha, die Bildli aa'gluegt
und aifach s'Händy gfrässe am Schluss.

Vor em Obligatorische, ha ych im Käller
mit em Sturmgweht g'üebt – s'sch nit guet gloffe
Bim rieggle isch mer e Schuss ab und hett
der Sunntigshuet vo dr Schwiegermueter droffe.
Da'sch so e «Queen Elizabeth-Gedächtnis-Deggel»,
rundumme mit Röseli und Thuja,
jetzt sait si, zer Stroof käm si nimm uff Bsuech:
«Hallelujaaaaa!!!»

Ych lytt aa bi «Telmed», do mäldet sich Kl:
«Tun sie uns ihre Schmerzen sagen».
Ych sag: «Ych ha bitzeli Kopfweh, bitzeli Buuchweh
und einen schlechten Magen.»
...und frogg: «Git's do scho e Diagnose,
wenn's mir sooo schlächt goot?»
Sait Kl: «Wenn sie weiter so jammern,
sind sie in zehn Minuten tot.»

Me seht jo vil jungi Fraue, wo e Kinderwage stosse,
mit em Handy am Ohr,
letschthi sehn ych Aini ohne Handy am Ohr
und dängg: «Das kunnt mir komisch vor».
Denn lueg isch ins Wägeli yyne,
das het mini Stimmig grad killt,
wo ych gseh, dass s'Buschi mit em Mami sim Handy Online-
Poker spielt.

Die 40-jährigi Lindsey Vonn git e Comeback uff Schii
und wird aapöblet
Dr 60-jährigi Mike Tyson boxt gege e Youtuber
und wird vo däm vermöblet
In dr Japan-Profiliga schuttet e 58-jährige
und ych ha erfahre, was ych ni hätt erfahre sotte:
Dr Fabio Celestini häb fir dr näggscht Match
dr Karli Odermatt uffbotte.

Ych bi am letschtmeeglige Daag in e Filiale vonere CS,
ha nimm gschloofe, s'hett mi ploggt
Ob s'Gäld sicher uff e UBS-Konto kunnt,
han ych e junge, Dynamische mit Gel-Frisur gfrogt
«Aber nadyyrilig» hett dä gsait, «si wisse,
unsere overschte Kaderlyt ka me vertraue»,
do han ych noodänggt und em Ain an d'Schnuure ghaue.

Wottsch au by uns bänggle?

Uff www.vsg-basel.ch erfahrsch meh!



Fasnacht 2025



Dr Globus khört jetz nümme uns – Thailänder hän – dä übernoo
Mi Härz het scho e bizli bluetet – das mien dr doch verstoo
Nach Grossumbau – hett dr Globus – überall neu! Wänd
Griegsch jetz gfälschti Uhre – und Massage mit Häppy Änd

Im Tesla han ych e Dashcam drin – di macht gstoche scharfi Foti
Wenn den wieder so e Bachel – mir dr Wäg schnyydet mit em Trotti
I schrey den lut – du Luuszapfe/Schlawiner/
Sufflûûdi/Dùùbeli – fahr doch zur Höll
Do froogt mi s'Navi – unverhofft – öb i wirkligg nach Ziiri wöll

Ziiri brucht e neue Name – und zwar ein mit Rasse
Sommerau – hän mir uns dänkt – würd prima zur Stadt passe
E Namenswäggsel isch ächt böimig – und au no richtig schlaue
Den Ziiri isch im Winter scheisse – und im Sommer au

Yi gang in e Abideegg – will e Präservativ go böschte
bruch di für e Sitesprung – froog was di würde koschte
hän sy unsri – Kundekarte – das macht denn Frangge Siebe
und uff mi Karte wärde no – Treuepunkt guetgschriibe

Letschti han yych – dr Shaqiri – in dr Rio-Bar aatroffe
Mues zue gää – nüm niechtern – sondern scho e bizli bsoffe
Völlig usem Hüsli het – är mir e Umarmig gschänggt
Är häig grad bim schiffe – s'Bälleli im Goal versänggt

Mi Frau – wo sie das gläase het – het sich staargg empört
Di Zueständ bi dr Basler Bolizey – sige unerhört
Yich sag zu ihre – reg die ab – worum duesch du jetz eso
Du würdsch jo – sicher nie – uff däre «Fickbar»-Liste stoo

Friener het dr Coiffeur – Coiffeur gheisse – jä es isch no geil
Hüt heisst dä nüm – Coiffeur – sondern neu– Hair and Style
Uffgrund vo dinere – Frisur würde mir – di Coiffeur gärn mol gsee
Dä heisst sicher – nid Hair und Style – sondern Hair-je-mine

Zum Gäld verdiene gitt's – no ganz anderi Meegligkeite
Kasch bi Onlyfans – die Keerper im Internet verbreite
E Gritte schlooft mit 1000 Männer – es isch e wenelig gruusig
Das sin sicher – Type gsi – von'ere Guggemuusig

Di dütschi Ampele – isch uf'em Abstellglais – si düens nid anekriege
Di andere düen – bi jedere Gryzig – immer hart nach rächts abbiege
E Abstellgleis gitts au bim ESC – mir häns beidi gsee
Grad hinter dr Halle duure – reserviert für'e Sven Epiney

Yich dreih – im Gellertquartier – im Auti so mini Runde
Suech e Parkplatz – und das au – scho syt viile Stunde
Ändligg hanyi – eine gsee – e Parkplatz für mi Kaare
Bi aber jetz – im Gundeli – bruch s'Drämmli zum heime faare

S'Läabe isch oftmols heggdisch – amigs au richtig Stress
Sait mi Schatz – am Wucheänd – gön mir ins Wellness
Mi Frau han iyich – nid mitgnoo – do'drzue mues yi stoo
Sie het gmaint – yi söll dr Stress – aifach dehome loo.

Kum beriert e Schneeflöggli – d'Ärde vo Basel-Stadt
Schlittle sy – dr Spalebärg durab – mir finde das no glatt
Jede hett e riese Plausch – fascht alli faare mit
«Do isch d'Leitstell vo dr BVB» – es schneit – «Mir fahre nid»

Mir sin e bitz verwirrt – loosed was yich eich verzell
Dr Trump isch e komische – är isch transfinanziell
Zwar isch är – Millionär – het e schöns Huus und e schöni Frau
Aber isch halt gfange – im Keerper von'ere arme Sau

Dr Elon Trump – und dr Donald Musk – die dien ständig bschisse
Wänn sich – Grönland und Panama – untere Nagel risse
Trotz Milliarde – Macht und Gier – und däm ständige liege
Unseri schöni Stadt Basel – wärde die zwei – niemols kriege

Danggscheen für die glatti Zyt – mir hän zämme glacht
und gön jetz eine witter... mir winsche «scheeni Fasnacht»

Wottsch au by uns bänggle?

Uff www.vsg-basel.ch erfahrsch meh!



Fasnacht 2025

Jetzt hett me im Baudepartemänt
Fir mee Fänschter – Löcher gmacht in d'Wänd
Aber nit dass mee Liecht ins Büro kunnt
Nai – das hett ganz en andere Grund
Die Löcher hänn si mache miesse
Will si täglich s'Gäld zu de Fänschter uss schiesse.

Wenns die ganz Zyt schifft vo obe uff d'Ärde.
Isch Gfoor dass voruss alles nass ka wärde
Und schneyt's emol zimpftig bi uns do unde
Isch dä Schnee nach 2 Daag wieder verschwunde
Und waiht e liechts Lüftli mit laue Winde
Hänn die Ziircher Angscht zem dä Schyys-Böög azinde.

Die Tigermugge isch immer no im Land
Au dr Japankäfer nimmt do überhand
Denn hett's au no die asiatische Hornisse
Und die Bettwanze wo aim ins Fudi bysse
S'schlimmscht Ungeziefer wo mer jetz no mien ha
Isch dä gefährlich Tramp-Schädling us Amerika.

Bi däm Friedens-Banggett uff em Bürgestogg
Gitts Schwarznase-Gschnätzlets mit Härdepfelstogg
Koschtet hetts zem Discautpriis nur 15 Milliönli
Und nach em Ässe hänn die Maischte e rächts Ballönli
Denn hett d'Miss Wallis-Amhärde ihri Dischreed agfange
No hänn fascht alli görbslet, sinn uffgestande und gange.

Dr Megge und dr Hampe sinn zwai Gniesser
Si hogge ständig anere Creemschnitte bim Schiesser.

Im Wallis gitts Wyybuure wo aim zimpftig bschysse
Sigs bim Rotwyy oder au bim Wyss
Die mischle und pansche und gheye Sache dry
Denn hett das Gsöff nimm vill z'due mit Wyy
E Tschugger maint zum e Winzer wäg däne Sache
waisch Buurli – dr Wyy ka me au uss Druube mache.

Die Gugge-Fusion wär unter Dach und Fach
Aber dr Name Messingkopf isch plump und schwach.
Denn heisse d'Fassadeschränzer und d'Tränefurzer
Binere Fusion aifach Fassadefurzer
Und bi de Guggemysli und Räpplispalter
Haissts den eifach Myslispalter
Und bi de NegroRhygass und Schränzgritte
Die heisse denn aifach Rhygass-Gritte.

Vom Lädelistärbe ghörsch immer und immer
Aber s'Beizestärbe isch für mii vyyl schlimmer.

Jetzt hett d'Migros d'Sportabdaily verkauft
Und au d'Melectronic wills nimm so guet lauft
Drfir hänns jetz Obschkärne zer Wahl
Und Sunneblueme- und anderi Kärne im Regal
No frogd ain worum dien ihr jetz so Kärne offeriere
Mer wänn uns drum mehr uff s'Kärngschäft konzentriere.

Uff em Schwiizer isch nur no e Gotthälf Buure-Schau
Wenn y iischalt kunnt sicher Bauer sucht Frau
Oder ständig die Sändig Bi de Lüt oder Hornusse
Oder Landfraue-Kuchi oder Schwinge vorusse
Y glaub die hänn's Studio Züri vergrabe
Und sände das Züg jetz vom Ballebärg obenabe.

Dä Schuss isch zümpftig dernäbe gange
Nur s'Ohreläppli isch no abe ghange
Em Donald hett's nütt ussgmacht
Är het komisch gluegt und verdruggt no glacht
So knapp am Tod verby isch är sälli Nacht
Knapp am Tod verby isch au dr Biden, jede Morge Wenn er verwacht.

Jetzt no ai Värs, aber s'hett uns bi Euch do gfall
Und ihr sind s'allerbeschte Publikum vo alle.

Jetzt hett d'Schwiiz mit em Nemo gwunne, dasch toll
So gwinne mir do z'Basel grad nonemol
Deert ka me jo jede Mumpitz bringe
Kasch maskiert oder halber blutt go singe
Dum hänn mir zwai uns au agmäldet gha
Und singe dr Mundart-Song d'Schyssi isch verstopft im...

BÄFFZGI-GUETSCHYN:

WENN DU DÄ ABSCHNITT ABRYSISCH UND UNS GISCH
BYKUNNSCH DERFIR E NEJE WO NIT VERRISSE ISCH.

www.bäffzgi.ch

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Basel



Fasnacht 2025



Nachtschwärmer

Wäg dr Granggekassee, han i dänggt
Verkauf i s'Auti, ass es längt
Sotts denn immer nooni länge
Gang i go Banggomaate spränge

An dr Olympiade, i glaub, I spinn
Git's e Gstürm wäg eme Boxer-IN
I ka das Ganze nid verstoo
I froog mi Mami, däa weiss das scho

Fremdi kemme in unser Land
Si sind e Bloog, s'isch allerhand
Si wurde sich lieber wieder verdrugge
Die gott-verdamnte Tiigermugge

USA ruumt uff, s'isch nid zem saage
De Fremde goots jetz dert an Kraage
Dr Trump muess hälfe, gaar kai Froog
Bi unserer Tiigermugge-Bloog

Mi Domina macht Schluss, wie si mir fäält
Si het mi erniedrigt, bloogt und quäält
Erstatz für iiri Quäälerey
E Job by dr Baasler Bolizey

Drämmli, Drämmli, Drämmli, Drämmli
Drämmli, Drämmli, Drämmli, Drämmli
Mit däm Värs isch laider Schluss
Wäge Baustelle, kunnt halt nur e Bus

Uf d'Froog, wie ych zem Bahnof kumm
Bis zer Baustell, denn drum umm
I lueg umme, es wird mir schlächt
Welli Baustell maint äär ächt

Dr Trump verzellt mir, irgendwie
Mecht äär Grönland iine zieh
I ha iim denn dr Rootschlaag gää
Är soll doch gschiider Züri nää

Dr Musk maint, äär gheert zu de greeschte
Und zaigt daas mit äntsprächender Geeschte
Irgendwie e komische Kauz
Drzue fäält jetzte nur e Schnauz

Wottsch au by uns bänggle?
Uff www.vsg-basel.ch erfahrsch meh!



Fasnacht 2025

Echo vom Häntis



Ewägg mit de Fremde! Denn isch ändlig Rue.
Denn mache mer d Spittel und d Altershaim zue.

Jetzt gits denn drei Segg zum dr Abfall verstaue.
Und wär das nit will, dörf no s Rhybord versaue.

Nach de Basler Wahle – E Sensation, ich bi froh
Es isch halt wiä immer – es sinn alli no do!

D'Wiedergeburt vom Trampelstielz, de Goof git z'diskutiere.
D'Amis sind jetzt in dr Pficht, d'Pille danach z'lanciere.

Pro Natura tuet jetzt gendere, passt zum ESC grad sehr,
Als Johrestier en Schnirkelschneck, das Schneck isch nonbinär.

Jetzt chunnt dr schwarzi Ritter, – dr Root chunt jetzt in Not.
Jetzt hocke fünf rechts usse, – jetzt kippt da huere/volli Boot.

Z'Fasnachtsmotto isch grad gebig: Sig eifach wie de wottsch!
Als Zürcher aber s'Motto, nid übertriebe sottsch.

Nach Murer, Röschi, Chiesa – und Dettling Gompelohni
Vermisst me doch scho beinah – dr Toggenburger Toni.

Who is Who, jetzt rootet mol, – da isch kei schwierigs Quiz.
Isch Trychler-Fründ, het huere Luscht – und rüeft erfreut: Hoi Alice.

Im Summer schynt d Sunne, im Winter gits Schnee.
Das wüsse mer alli – nur nid d'BVB

Nach de Basler Wahle –E Sensation, ich bi froh
Es isch halt wiä immer – es sinn alli no do!

Dr Netanjahu,
dr Putin,
dr Erdogan,
dr Orban...
Me sott dene Sieche, – dr Marsch – jetzt muesch lose,
Mit eme guetgspitzte Piccolo – dr Arabi/in Arsch go blose

Nach Europa nei, da wemmer nö! – D'SVP git z'Bescht.
Es stampft und plärnt mit Hellebard. – Da wär e Fall für Kesb.

Wottsch au by uns bängle?
Uff www.vsg-basel.ch erfahrsch meh!



Fasnacht 2025



S Daameryschli

Sii dä Donald Trump isch nit grad so e Scheene
Ains muess me em loo syni Hoor ka är guet feene
Jetz het sich doch dä Möchtegärn-Toupet-Figaro
Doch wirgglig no im hooche Alter e Oorelechli schiesse loo

Sii dä Donald Trump isch immer no kai Scheene
Am liebschte duet är Fraue, eb si wänn oder nit, “verweene“
S Melania duet är im Bett sit langem nimm begligge
Will jeedi Nacht dä Elon Musk im Bettgräabli duet ligge

Hoggsch uff em Hyysli mit Verstopfig – s kunnt heggschtens warmi Luft
De murggsisch, grampfsch di ab – me schmeggt e stargge Duft
No jodlisch in de heggschte Deen, wie e kaschtrierti Katz
Und gwinnsch derbyy am Songcontest esoo dr eerschi Blatz

Dr Mustafa Atici vom Erziehungsdepartemänt
Goot go Schuele bsueche und froogt mit sym Aggzänt:
«Was würd eich gligglig mache – wo händ iir no Bedaarf?»
Do sait e Binggis zuenem: «Y nimm e Döner ooni Schaarf!»

Für d Stadtwaal vom ESC hän villi welle kandidiere
S wird ermittelt wär dä Aalooss guet könnst duurefiere
Züri isch denn zimlig schnäll au dusse us däm Renne
Die schaffes jo nit emol elei e Böög z verbrenne!

Wenn an dr Fraue-EM nur Politikerinne derfte spiile
Wär würdi denn für d Schwiz uff em Blatz verwiile?
D Baume-Schneider het kai Zyt und isch drum nit drbyy
Sii hinggt no mit dr AHV-Berächnig hindedryy
9 Fraue uff em Blatz düen dr Käller-Sutter länge
Will 11 Spielerinne würde s Budget komplett spränge
Mit dr Eymann uff em Fäld, wärs uns nit so wool
Will die schiesst zwüscheduure no gärn e Aigegoal
Für d Ineichen Anina hets nur uff s Bänggli glänggt
Dr Stammplatz het me drum em Esthi Käller gschänggt
D Martullo loot nyt duure goo – die würd das Goal verschliesse
Und d Ameti glaar im Sturm will die scharf duet schiesse

Dr Ralf Schuemaker isch nümmer heterosexuell
So wäggslet är syni Carosserie ab sofort offiziell
Friener het är s nit gärn ghaa, jetz freuts en uff e Aart
Wenn em ab und zue mol eine hinte iine faart
Dääglic faart dr 8er uff Weil – und wiider zrug
Scho 10 Joor dääglic, s isch unglaublich, faart dä über d Brugg
Zueverlässig faart das Dramm – dasch unseri BVB
Usser s liggt mol neume 1cm Schnee

Sii die Viola Amhänd het schiints Säuli schampaar gäärn
Doch das sigg iire jetz e z grosse Saustall z Bäärn
Wäg so Lapalie gitt die uff – verdrait denn die nit mee?
Die het no nie dr Eymann iire Schugger-Saustall gsee

D Frau Diarrhée het letschi e Brobleemli ghaa
Dr Doggter luegt denn ire griene Stuelgang gnauer aa
Är diagnoschtiziert und maint: «Lön siis numme laufe,
Das könne sii verpagge und as Dubai Schoggi verkaufe.»



Wottsch au by uns bänggle?
Uff www.vsg-basel.ch erfahrsch meh!





Basel (USA)

Hello my name isch käthi, und i living in se clara street
i am very old, and not so good on my feet
also i bi parat, due de carlo in yankee lo umtaufe
wenn de trump denn duet, nach grönland d schwiiz au chaufe

Freie Stross

E neyi pflaschterig, vo oobe bis ganz unde,
Neui sitzbänk, mit bäumli, do die runde,
nei das hän sie scho schön gmacht, die neui freye stross
jetzt bruchts no d läde, denn wär au öppis los.

Ample

Du de Carlo, ich glaub das isch e schwoob,
und i mein das jetzt, sicher nid als loob,
dä pisst an jedi ample, nei das macht mi muff,
und pflanzt sin bruune kack, au no oobedruf

Jesus

Gebore im Stall, zwüsche Viehmischt, das kleine kind
Nur alti säck dezue, bringe spielzüüg, wo keini sind
Lueg do chöme no so hirte, mache ihm de hoof
Und denn schiesst d Sanja Ameti uf dä armi goof

Breakdance

D hüfte quitscht, d bei sind stoff, alles duets mr weh,
Mini füess, die hani au scho lang nüm gseh
Stäge laufe goht nur schwer, wie söll das witergoh,
Trotzdäm hätti olympisch, gold im breakdance yyberkoh

Odermatt

Yy lies in dr zyytig, de marco dä hets gschafft.
Jede bärg, jedi strecki, eifach meischterhaft
Plötzlich rast eine durch d gasse, slalom um mi ume,
Und so het dr Odi, de spalebärg au gwunne.

Viola

jetzt hani gnueg, verzellt d viola mir bim kaffi,
die bim militär, das sige alles schlaffi,
Deheime sigs doch besser, das hägi doch kei wärt,
Sie stoht halt lieber, dehei... am thermomix.

KrankeKasse

Mi fründin, die het die 4. jetzt bikoh,
die ander, die het fusspilz griegt, das hani vernoh,
die dritti die het durchfall griegt, sitzt nur ufem klo,
mir gohts mieser, ha d krankekasserächnig übercho

Radio

Bi däm neue SRF, do hani nüt meh z murre,
Sit afang johr, hebe die ändlig d schnurre

...

Neinei, spinnsch nid, hesch cho richtig gseh,
die pointe gits au nur uf DAB

Dubai-Schoggi

Em Carlo fiettere ich zum zmorge immer stocki,
jetzt hanis usprobiert, mit däre dubai schoggi
nei jetzt ischer konvertiert und duet ständig betone,
är will nüm mit mir, är will mit me harem wohne.

An dr Kasse

I stand am Claramärt, im Lade an de Kasse,
Do schreit das junge Beeri an de kasse, i kas nid fasse,
nei das gits jo nid, das hätti nie döffe hoffe
jetzt hani e gründigsmittglied vo de Migros troffe

Tesla

Mim Sohn sii Tesla isch eifach explodiert.
Denn hani grad de elon kontaktiert,
Es telefon, en händedruck, mir händ nid diskutiert.
Und in Züri die teslas, als böögg grad integriert

Uf dr Reis

Y pack i mi chörbli e Öpfel, e warme tee,
zwei paar Socke, Schlüpfer und mis Negligée,
No e Schlofsack, e Chüssi denn chani au guet pfuuse,
Wenni mitem drämmli fahr, churz uf rieche use

Nochber*in

I han e neue nochber...
I han e neui nochberin...
I han e neui person wo näbe mir wohnt, s isch ganz e liebe.
E liebi. E liebs.
Wieni ihm. Ihre. Ihms jetzt sag, das muess ich no iiebe.
S git nume ei problem, und das isch nid gloge.
Bis i dä vārs fertig ha, isch är. Isch sie. Isch äs.
Scho wieder uszoge.

Wottsch au by uns bänggle?

Uff www.vsg-basel.ch erfahrsch meh!



Fasnacht 2025 s'Käller Dürli

E Orang Utan sait im Zolli zem Hai:
«Ich fyyl mi nimm woohl i mim Keefig ellai.
Mi Aartgenoss hän sy – in hoochem Booge
yber Nacht in e andere Zolli gflooge.
Jetzt isch doch dä Aff grad juschtamänd.
Z Amerika widr dr Breesidänt.

«Sygg wie d wottsch» isch s Motto – juhee!
An dr Fasnacht bisch wie de bisch gärn gsee.
Mir Basler dien alli toleriere,
aber bi aim do muessi insischtiere:
als Zircher duesch d Fasnacht lieber schwänze,
will au Toleranz het sini Gränze.

Wenni am Match gang go saiche, kasch sicher sy,
haut dr Shaqiri de Gäägner e Freischtoss dryy.
Gangi währed em Lauberhoorn schnäll go pfunde,
isch dr Odermatt sicher am schnällschte dunde.
Au mini Arbetskolleege staigere sich schaarf,
wenni ooni z'stämple uff d Schissi darf.

Ich ha do e Witz, jetzt mien dir loose,
bi däm mached ihr eich vor lache in d Hoose.
Vor Vergniege draied ihr grad am Rad,
ok, jetzt bring en, sin dr barat?
«Mir bringe sie haim, durch wind und Schnee:
Dangge firs Vertraue – Ihri BVB.»

In dr Rhygass gseen ich – dasch nid zem lache –
wie zwai schmierigi Type e Frau aamache.
No bini aane zu deene Chauvinische-Säu:
«Leend se in Rueh oder ich brich eich d Knei.
Nach deere Droohig, hän die Sieche drnoo,
mi in Handschälle mit uf dr Poschte gnoo.

Wo d Zircher dr Böög im Appezäll verbrenne,
und mit Stäggepfärdli drum umme renne.
Do hann ich welle, für eich zem lache,
e Hammer-Väärsli dryyber mache
Ich ha denn entscheide, bimene Bier im Krueg,
D'Realideet isch scho däämlich gnueg.

An de olympische Spiil – es däät dr Gsundhait schaade,
sin d Athlete fir e Medallie in dr Seine go baade.
Au dr vo Wattewyyl het sich drzwische druggt,
und bim schwimme das gruusige Wasser gschluggt.
Aaber uf Tele Basel – hanni erliichteret vernoo –
het är da ganz Saich widr uuse gloo.

Dr Trump dä het, so wie me ihn kennt,
dr Golf vo Mexiko umbenennt.
Ich ha jetzt dr Rhy, wills im Summer lauft,
in Wiggelfisch-Sammelschtell umdauft.
Und d Aare z Bärn isch ganz banal,
dr BSC Young Boys-Dräänekanal.

Wo d Schwyz am ESC duet gwinne,
und Nemo alli andere an d Wand duet singe.
Do hanni minere glai Nichte uf d Naase bunde:
Krümmel, loos, ich haa dr Nemo gfunde.
No hett sie gfroggt: «Dr Sänger oder Fisch?»
«Är waiss glaub sälber nid was är isch.»

Wenn dir noo mee vo mine Bängg wänd gsee:
Ich haa e Youtube-Kanal im WWW.
Uff Instagräm findsch e ganz Parade
vo Föteli, wonni due uffelaade.
und uff Onlyfans – fir eich e Gnuss,
sing ich d'Väärsli mitem Limmel duss.

Geege s Esthi Käller will ich nid schiesse,
obwohl sie in e zwaite Wahlgang het miesse.
Ich kas soowisoo nid rächt verstoo
wiesoo het äs z wenig Stimme bikoo.
Nach minere Erfaahrig lauft ganz fesck,
wenn de «Käller» im Namme hesck.

Wottsch au by uns bänggle?


Uff www.vsg-basel.ch erfahrsch meh!





**Wenn das mit dyym Händy goot
Fottele dr QR Code
So kunnsch uf unser WWW
Wo d Värslì und no mee kasch gsee
Wottsch News vo uns, so all Quartal?
Abonnier dr WhatsApp-Kanal
Sottsch di als Fan vo uns entpubbe
Folg uns uf dr Facebook-Grubbe!**

**Zu de
Värslì**



**Zum
Kanal**



**Zur FB
Gruppe**



**Wottsch au by uns bänggle?
Uff www.vsg-basel.ch erfahrsch meh!**

